

Lagamento di sushi bay lama ta un problema pa nos medio ambiente

ORANJESTAD – Castro Perez di Aruba Reef Care Foundation, a expresa su preocupacion cu hopi sushi ta bay lama. Den e fin di siman carnavalesco aki por a tuma nota cu esey tabata e caso y e ta sinti cu pueblo mester compronde cu nos flora y fauna marino ta un parti esencial di nos sociedad, aunke cu ta den lama.

E ta sigui relata cu constantemente ta papia na radio, television, na tur instancia, pa purba di conscientisa pueblo mas hopi posibel na momento cu ta bay beach, pa bay cu saco di plastic of si tin caminda pa deposita e sushi, na unda cu e no ta bula bay bek den lama of cuallier otro caminda. Esey ta loke ta purba di sigui conscientisa e publico. Berdad hopi otro actividad tambe sushi ta bula bay lama y esey ta cosnan caminda cu Perez ta lamenta cada rato.

Ley di medio ambiente

Mirando e situacion aki, otro parti di mundo tin ley, tin hopi prevencion of algo cu ta wordo haci na Aruba. Segun Perez, tin ley di medio ambiente pa tiramento di sushi den mondi aki na Aruba. Loke mester wordo haci, ta reforsa e ley aki mas.

Contribucion di comercio

Constantemente mester haya contribucion di companianan grandi cu ta distribui manera cerbes, otro articulo nan di plastic cu por bula bay facilmente den lama, etc. pa nan yuda cu campananan di conscientisacion na television, radio of tambe corant, etc. Segun Perez, tur conscientisacion mester di un presupuesto. Un compania mester coopera y constantemente keda cu e mensahe ey pa asina hende bira mas consciente riba e topico ey. Hunto e mensahe di conscientisacion mester yega pa pueblo y mantene nos luga limpi. □

